



*Rabu, 27 Oktober 2021*  
**Ogen: Jeremia 29:11**



**Rencana Si Tepat**



**A**di bas sada organisasi lit ikataken program kerja. Program kerja enda eme kai-kai saja silakoken guna nehi tujun organisasi e. Kerina rusaha segelah program-program e banci jadi dalam nehken sura-sura. Bage ka pe i bas ndalani kegeluhen. I bas pusuhta pasti lit sura-sura si man sehenken. Erbage cara silakoken segelah tersehi kerina sura-sura e. Kalak Jahudi si tading jadi tabanen i negri Babilon, ngalaken mbue tangtangen ngeluh si reh, la terjeng si e lit ka pe si mereken harapan palsu singatakenca maka labo ndekah kari bangsa Jahudi itaban i Babilon seh maka kalak Jahudi si tading i bas Babilon lanai ngelakoken kai pe, sabap i bas ukurna labo kami kari ndekah tading i jenda. Situhuna labo bage, pitu puluh tahun ia arus ngeluh i Babilon. Engkai maka bage? La kin keleng ate Dibata bangsaNa maka bage dekahna jadi tabanen? Engkai maka arus ngeluh jadi tabanen, adi ieteh kalak bangsa e bangsa pilihan Dibata? ras sidebanna. Guna njabap si enda kerina ituriken maka Dibata e Si Mada Kuasa, IA si empuna doni enda. KuasaNa la tersipati, perukurenNa labo terukuri, kuasaNa la tersibari dengen la erbatas. Erdandanken si e sura-suraNa pe labo ise pe metehsa selain IA. Tapi sada si banci igelem dengen pengarapen bangsaNa e me IA mereken senang labo cilaka. Senang maksudna e me syalom entah pe kedamen, ketenangen. Dibata e mereken ketenengen, dengen seh pagi paksana alu cara si tepat isehkenna me si niarapken.

Padan enda labo terjeng man kalak Jahudi tapi man banta pe si tek man baNa. Aminna pe melala kal si langga terantusi kitaengkai banci jadi perbeben (pinakit, kecedan ate, tertaban, si jadi la bagi nisura ras sidebanna), tapi ingetlah maka adi ngeluh kita tetap rembak ras IA pasti iberekenna kedamen e. Ampekenlah kerina rencana-rencana kegeluhenta sabap i babo rencana si bahan kita e, lit rencana Dibata terulin.